

CONVENIO DE COLABORACIÓN ENTRE A DEPUTACIÓN DE PONTEVEDRA E A ASOCIACIÓN ESTUDANTIL UVIGO SPACELAB POLO QUE SE INSTRUMENTA A SUBVENCIÓN NOMINATIVA PREVISTA NOS ORZAMENTOS DA DEPUTACIÓN DE PONTEVEDRA DE 2024 PARA A ADQUISICIÓN DUNHA ANTENA E DOS SEUS COMPLEMENTOS NECESARIOS PARA DESENVOLVER O PROXECTO BIXO

EXPEDIENTE: 2024067933

**CONVENIO DE COLABORACIÓN ENTRE A DEPUTACIÓN DE PONTEVEDRA E A ASOCIACIÓN ESTUDANTIL UVIGO SPACELAB POLO QUE SE INSTRUMENTA A SUBVENCIÓN NOMINATIVA PREVISTA NOS ORZAMENTOS DA DEPUTACIÓN DE PONTEVEDRA DE 2024 PARA A ADQUISICIÓN DUNHA ANTENA E DOS SEUS COMPLEMENTOS NECESARIOS PARA DESENVOLVER O PROXECTO BIXO**

En Pontevedra, na data da sinatura electrónica,

**REÚNENSE**

Dunha parte, Luis López Diéguez, presidente da Deputación de Pontevedra, entidade co NIF P-3600000-H, quen actúa en virtude das competencias que se lle atribúen nos artigos 34.1 da Lei 7/1985, de 2 de abril, reguladora das bases do réxime local, e 105 da Lei 5/1997, de 22 de xullo, de Administración local de Galicia.

Da outra, Guillermo Calvo Hermo, en calidade de presidente da asociación estudantil UVigo SpaceLab e en representación desta.

Dá fe do acto Carlos Cuadrado Romay, secretario xeral da Deputación de Pontevedra.

Ambas as partes recoñécense con capacidade para formalizar este convenio e conforme aos principios de colaboración, cooperación, coordinación e eficacia que deben presidir as actuacións de calquera entidade pública. De acordo co anterior,

**EXPOÑEN**

**Primeiro.** No artigo 22.2.f da Ordenanza xeral de subvencións da Deputación de Pontevedra recóllese que as subvencións se poderán conceder de forma directa cando estean consignadas con carácter nominativo no Orzamento.

**Segundo.** O Pleno da Corporación provincial, na súa sesión ordinaria do 31 de maio de 2024, adoptou, entre outros, o acordo de aprobación inicial do expediente de modificación de créditos número 2/2024. Nel prevese nominativamente, entre outras, a subvención nominativa seguinte:



- Suplemento de crédito sup. 02/24:
  - o Aplicación orzamentaria 24/233.2310.789.01
  - o Denominación: A familias e entidades de iniciativa social Xuventude e Reto Demográfico-Asociación estudantil UVigo SpaceLab
  - o Importe: 10.000,00 euros

Rematado o prazo de exposición pública, non se presentaron reclamacións contra a devandita modificación do orzamento da Deputación de Pontevedra, polo que esta se considera definitivamente aprobada, de acordo co edicto publicado no *Boletín Oficial da Provincia de Pontevedra* BOPPO número 127, de 1 de xullo de 2024.

**Terceiro.** A asociación estudantil UVigo SpaceLab, con NIF G-02759801, presenta unha solicitude de subvención por un importe de 10.000,00 euros co obxecto de adquirir unha antena despregable Turnstile UHF e os seus complementos necesarios para desenvolver o proxecto BIXO.

**Cuarto.** Logo de avaliada a solicitude de subvención presentada pola asociación, acredítase que o expediente administrativo reúne os requisitos establecidos na Lei 38/2003, de 17 de novembro, xeral de subvencións (LXS) e na Ordenanza xeral de subvencións da Deputación de Pontevedra.

**Quinto.** No artigo 22.2.a da LXS establécese e regúlase a canalización da concesión de subvencións nominativas previstas nos orzamentos das entidades locais. Ademais, no seu artigo 28.1 dispónse que os convenios serán o instrumento habitual para canalizar as subvencións previstas nominativamente nos orzamentos e que nos devanditos convenios se establecerán as condicións e os compromisos aplicables de conformidade co disposto nesta lei.

**Sexto.** As administracións públicas poden formalizar convenios de colaboración con persoas tanto de dereito público coma privado, ao abeiro do disposto nos artigos 47 a 53 da Lei 40/2015, de 1 de outubro, de réxime xurídico do sector público (LRXSP).



**Sétimo.** A finalidade deste convenio é canalizar a favor da entidade beneficiaria a subvención que figura no vixente Orzamento provincial co seguinte texto literal: “A familias e entidades de iniciativa social Xuventude e Reto Demográfico-Asociación estudantil UVigo SpaceLab, importe: 10.000,00 €”. Tamén, establecer as condicións e os compromisos que asume a asociación beneficiaria.

De acordo cos motivos expostos e para que as dúas entidades cumpran cos seus obxectivos, ao abeiro do disposto no artigo 22.2.a da LXS, as partes comparecentes, na representación que exercen,

### ACORDAN

Formalizar o convenio de colaboración entre a Deputación de Pontevedra e a asociación estudantil UVigo SpaceLab para canalizar unha subvención nominativa coa finalidade de adquirir unha antena UHF e os seus complementos necesarios para desenvolver o proxecto BIXO, de acordo coas seguintes

### CLÁUSULAS

#### Primeira. Obxecto do convenio

Este convenio ten por obxecto establecer unha liña de colaboración mediante a cal a Deputación lle outorga unha subvención á devandita asociación estudantil para financiar os gastos derivados da adquisición dunha antena despregable Turnstile UHF e dos seus complementos necesarios para desenvolver o proxecto BIXO (Bacteriological Intercommunication eXperiment in Orbit), a través do cal se pretende poñer en órbita un satélite que estudará os efectos da exposición prolongada ao ambiente espacial en microorganismos vivos.



## Segunda. Contía, crédito orzamentario e orzamento

O importe da subvención ten unha contía de dez mil (10.000,00) euros, con cargo á aplicación 24/233.2310.789.01 do Orzamento provincial vixente.

O detalle do orzamento é o seguinte:

Descrición	Importe
Adquisición dunha antena UHF para o satélite	9.737,50 €
Investimento en equipamento de manexo e validación para a antena UHF	262,50 €
<b>Gastos totais</b>	<b>10.000,00 €</b>

## Terceira. Obrigas da Deputación de Pontevedra

O organismo provincial comprométese a:

- Aprobar e comprometer o gasto da subvención nominativa prevista no seu orzamento á asociación estudiantil UVigo SpaceLab e aboarlle o importe de 10.000,00 euros, condicionado ao cumprimento dos termos establecidos neste convenio.
- Tramitar, resolver e notificar o convenio nos termos nel establecidos.

## Cuarta. Obrigas da entidade beneficiaria

1. A entidade beneficiaria contará cos recursos e cos medios materiais e persoais suficientes para garantir o desenvolvemento do seu proxecto.

2. Así mesmo, comprométese a:

- Cumprir o obxectivo, executar o proxecto, realizar a actividade e destinar os fondos percibidos ao obxecto concreto para o cal se lle concederon, de acordo co proxecto achegado xunto coa solicitude.
- Xustificar ante o órgano concedente o cumprimento dos requisitos e das condicións, así como a realización da actividade e o cumprimento da finalidade que determinen a concesión da subvención.
- Comunicarlle á Deputación a obtención doutras axudas que reciba doutras entidades públicas ou privadas para a mesma finalidade.



- Facer constar a colaboración e a participación da Deputación en toda a publicidade que elabore sobre o convenio, independentemente do medio de difusión.
- -Estar ao corrente das obrigas tributarias coa Axencia Estatal de Administración Tributaria (AEAT), coa Facenda galega, coa Seguridade Social e coa Deputación de Pontevedra, e non ter obrigas ou incumprimentos pendentes, de calquera tipo e non só económicos, coa institución provincial.
- Someterse ás actuacións de comprobación que leve a cabo o órgano concedente ou entidade colaboradora, no seu caso, así como calquera outra de comprobación e control financeiro que poidan realizar os órganos de control competentes, tanto nacionais coma comunitarios, e achegar canta información se lle requira no exercicio das actuacións anteriores.
- Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.
- Facilitar toda a información que lle sexa requirida pola Intervención xeral da Deputación de Pontevedra no exercicio das súas funcións de fiscalización e control do destino das axudas.
- Cumprir cos demais supostos contemplados neste convenio ou calquera outra obriga prevista no artigo 14 da LXS.
- Prestar o seu consentimento para incluír e facer público, se así se estimase, no rexistro público de axudas, subvencións e convenios, este convenio de colaboración.

#### **Quinta. Notificación electrónica**

As notificacións de resolucións e actos administrativos practícaranse só por medios electrónicos, nos termos previstos na normativa reguladora do procedemento administrativo común.



### **Sexta. Gastos subvencionables**

Consideraranse gastos subvencionables aqueles que estean correctamente xustificados de conformidade coa normativa en vigor, sexan necesarios e respondan de maneira indubitada á natureza e ao normal desenvolvemento do proxecto. Estes deberán corresponderse cos conceptos e importes detallados no orzamento que se incorpora como anexo a este convenio, sen prexuízo do réxime de desviacións e modificacións que resulte aplicable.

### **Sétima. Prazo e procedemento de xustificación e pagamento**

A entidade beneficiaria asume o cumprimento das obrigas establecidas nos artigos 14 e 30 da LXS e no capítulo II do Real decreto 887/2006, de 21 de xullo, polo que se aproba o Regulamento da LXS, relativas á xustificación das subvencións públicas.

A entidade beneficiaria deberá xustificar, obrigatoriamente por medios electrónicos, a aplicación da subvención mediante o modelo de conta xustificativa dispoñible en <https://sede.depo.gal>.

O prazo para presentar a xustificación da axuda rematará o **31 de xaneiro de 2025** e para isto entregárase a seguinte documentación:

1. Conta xustificativa na que se relacionen os gastos establecidos no orzamento presentado por un importe de 10.000,00 euros e executados no desenvolvemento da actividade, tal como se establece no artigo 30 da LXS.
2. Xustificación de ingresos, na que se relacionen outras axudas concedidas para a mesma finalidade, así como os importes correspondentes a doazóns, patrocinios e outros ingresos que lle afecten total ou parcialmente á actividade subvencionada.
3. Facturas ou documentos análogos con valor probatorio no ámbito mercantil e administrativo polo importe da subvención concedida; en cada factura indícaranse o número de unidades, os prezos unitarios destas e mais o custo total.
4. Memoria da actividade que se realizou, debidamente asinada, na que figuren todas as actividades efectuadas e sinaladas previamente e na que se indiquen os obxectivos acadados, as actividades levadas a cabo e os resultados obtidos.



5. Acreditación da debida divulgación do financiamento da actividade subvencionada mediante soportes publicitarios, físicos ou telemáticos que inclúan o logotipo da Deputación de Pontevedra.

A falta de presentación de xustificación, unha vez transcorridos os prazos salientados, dará lugar ao requirimento de xustificación por parte da Deputación no prazo improrrogable de quince (15) días, segundo o disposto no artigo 25.3 da Ordenanza xeral de subvencións da Deputación.

A falta de presentación da xustificación neste novo prazo de quince (15) días comportará a perda do dereito de cobro e/ou reintegro da subvención outorgada ao abeiro deste convenio de colaboración.

Outras normas que se deben ter en conta na xustificación son as seguintes:

- Os gastos xustificandos deberán axustarse aos conceptos incluídos no orzamento inicial; establecerase unha porcentaxe de desviación máxima no custo dos diferentes conceptos con respecto ao orzamento inicial do 20 %.
- O pagamento das facturas que figuren na conta xustificativa deberá efectuarse, de non facelo antes, no prazo máximo dun (1) mes desde a percepción dos fondos e preferentemente a través de entidades financeiras. Será obrigatorio cando o importe de cada factura supere os novecentos (900,00) euros.
- A concesión desta subvención é compatible con outras que se reciban para o mesmo fin; terase en conta que o conxunto de todas elas en ningún caso poderá superar o 100 % do custo da actividade que se leve a cabo.
- A entidade beneficiaria, de acordo co establecido no artigo 31 da Ordenanza xeral de subvencións da Deputación de Pontevedra, estará suxeita ao control financeiro que se poida exercer no prazo de catro (4) anos, contados a partir do pago da subvención. Indicaráselle que, de non ter contabilidade fiable, só serán subvencionables os gastos que se poidan acreditar mediante extractos bancarios (independentemente do importe destes).
- Para pagar a subvención, terase en conta o seguinte:
  - En caso de que se xustifiquen gastos polo 100 % do orzamento subvencionado, aboarase a totalidade da subvención.





- En caso de que se xustificuen gastos inferiores ao 100 %, sempre e cando se acredite o cumprimento da finalidade ou do proxecto subvencionado, aboarase a parte proporcional da subvención.

O pagamento da subvención efectuarase por transferencia á conta bancaria indicada pola entidade perceptora.

Para aboar a cantidade, a entidade deberá estar ao corrente das súas obrigas tributarias coa AEAT, coa Facenda galega, coa Seguridade Social e coa Deputación de Pontevedra, e non poderá estar incurso en ningún dos supostos de incapacidade ou incompatibilidade para a percepción de axudas ou subvencións públicas nin incorrer en ningún dos casos de prohibición para percibir subvencións recollidos na lei.

#### **Oitava. Compatibilidade**

Esta subvención será compatible con outras subvencións, axudas, ingresos ou recursos para a mesma finalidade, procedentes de calquera outra Administración ou ente público ou privado.

Conforme ao disposto nos artigos 19.3 da LXS e 17.3 da Lei 9/2007, de 13 de xuño, de subvencións de Galicia (LSG), "o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada".

Ademais, será incompatible con calquera subvención para a mesma persoa beneficiaria e a mesma finalidade, con cargo a créditos desta Deputación e dos seus organismos dependentes, en especial, coas convocatorias de subvencións a entidades sen fins de lucro da provincia de Pontevedra para o ano 2024 da Deputación de Pontevedra.

#### **Novena. Comisión de Seguimento**

A Deputación de Pontevedra exercerá a dirección, supervisión e control das tarefas obxecto do convenio.

Para tal fin constituirase unha comisión mixta de seguimento, control e avaliación á que se someterán todas as cuestións derivadas do desenvolvemento deste convenio, así como a resolución de cantas dúbidas poidan xurdir sobre este.



Esta comisión estará composta, en representación da Deputación de Pontevedra, polo deputado delegado de Reto Demográfico, Xuventude, Desenvolvemento Rural e Cultura, que presidirá a comisión; pola xefa do Servizo de Xuventude e Reto Demográfico ou pola persoa en quen delegue; e, por parte da entidade, polo seu presidente ou pola persoa en que delegue.

#### **Décima. Control, seguimento e avaliación**

A Deputación Provincial de Pontevedra establecerá, como medida de garantía a favor dos intereses públicos, os mecanismos de control que estime necesarios para asegurar o cumprimento da finalidade perseguida neste convenio.

O persoal técnico do Servizo de Xuventude e Reto Demográfico velará por que se cumpran as condicións esixidas para a concesión da subvención e para que se realicen correctamente todas as actuacións previstas na memoria da actividade.

A través da área de Intervención, esta subvención poderase someter a control financeiro, tal e como se establece nos artigos 44 da LXS e 31 da Ordenanza xeral de subvencións da Deputación de Pontevedra.

De acordo co establecido na Resolución presidencial do 14 de febreiro de 2023 (núm. de rexistro 2023001273), segundo o procedemento establecido na Resolución presidencial do 3 de maio de 2017 (núm. de rexistro 2017008767), en relación coa remisión ao Tribunal de Contas dos convenios que se formalicen coa Deputación e cos seus organismos dependentes, no artigo 53 da LRXSP e na normativa de desenvolvemento (Instrución do Tribunal de Contas, Resolución do 2 de decembro de 2016), as entidades locais deben remitir anualmente, e por procedemento telemático, unha relación certificada na que se detallan os convenios formalizados pola entidade local (e as súas entidades dependentes) no exercicio anterior, independentemente do seu importe e antes de que conclúa o mes de febreiro do exercicio seguinte ao que se refira.

Ademais, deberán comunicarse as incidencias que xurdan durante a súa execución (modificacións, prórrogas ou variacións de prazos etc.) no prazo de tres (3) meses desde a data en que se produzan.



Para tales efectos, co obxectivo de contribuír aos principios de publicidade e transparencia, este convenio publicárase nas páxinas web das entidades asinantes.

#### **Décimo primeira. Entrada en vigor e vixencia do convenio**

Este convenio entrará en vigor na data da súa sinatura e manterá a súa vixencia ata o 31 de xaneiro de 2025.

En canto ao período de realización das actividades, este abrangue desde o 1 de xaneiro ata o 31 de decembro de 2024, con independencia da data na que se asine.

#### **Décimo segunda. Modificación do convenio**

Toda alteración das condicións tidas en conta para a concesión desta axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación da contía da axuda contemplada neste convenio.

Ao abeiro do previsto na Ordenanza xeral reguladora das subvencións da Deputación de Pontevedra, a entidade beneficiaria ten a obriga de presentar unha declaración de axudas ou subvencións concedidas para o mesmo fin que o estipulado neste convenio.

A suma do conxunto das axudas solicitadas e/ou concedidas para o obxecto do convenio non poderá superar o 100 % do custo da actividade que se vai desenvolver. Non obstante, por parte da entidade beneficiaria, non poderá subcontratarse máis do 50 % do importe da actividade subvencionada.

#### **Décimo terceira. Causas de resolución**

Serán causas de resolución do convenio as previstas no artigo 51.2 da LRXSP, que poderán dar lugar, no seu caso, ao reintegro das cantidades percibidas cos seus correspondentes xuros.

#### **Décimo cuarta. Reintegro ou perda do dereito ao cobro da subvención**

As subvencións concedidas deberán reintegrarse cando as causas sexan posteriores ao pagamento destas.

Producirase a perda do dereito ao cobro da subvención e/ou reintegro, total ou parcial, no suposto de falta de xustificación ou de concorrencia dalgunha das causas previstas na lexislación de subvencións e, en concreto, nos seguintes supostos:



- Incumprimento das obrigas establecidas con motivo da concesión da subvención.
- A falta de achega dos autorizacións ou permisos necesarios para realizar a actividade.
- O incumprimento da obriga de presentación de xustificación nos termos establecidos.
- O incumprimento das demais causas recollidas na normativa de subvencións.

#### **Décimo quinta. Control financeiro**

O control financeiro fará referencia á totalidade de gastos e ingresos da actividade subvencionada.

A contabilidade deberá estar reflectida nos libros contables co total de gastos e de ingresos e, no caso de ser positiva, a entidade deberá reintegrar o importe resultante, conforme á lexislación vixente, na que se indica que o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

#### **Décimo sexta. Réxime xurídico e lexislación aplicable**

- Lei 38/2003, de 17 de novembro, xeral de subvencións (LXS)
- Real decreto 887/2006, de 21 de xullo, polo que se aproba o Regulamento da LXS
- Lei 9/2007, de 13 de xuño, de subvencións de Galicia (LSG)
- Decreto 11/2009, de 8 de xaneiro, polo que se aproba o Regulamento da LSG
- Lei 39/2015, de 1 de outubro, do procedemento administrativo común das administracións públicas
  - Ordenanza xeral de subvencións da Deputación de Pontevedra (BOPPO núm. 249, de 30 de decembro de 2016)
  - Bases de execución do Orzamento provincial vixente
  - Con carácter supletorio, a Lei 40/2015, de 1 de outubro, de réxime xurídico do sector público



As lagoas ou controversias que xurdan na aplicación deste convenio serán interpretadas e resoltas motivadamente pola Administración provincial, logo do ditame non vinculante da comisión á que se fai referencia neste convenio.

Contra estas resolucións e polo carácter administrativo deste convenio, resolveranse na orde xurisdiccional contencioso-administrativa.

### **Décimo sétima. Relación laboral**

A subscrición deste convenio non implicará ningunha relación laboral nin de calquera outra natureza, entre as persoas ou profesionais que desenvolvan as accións que constitúen o obxecto deste convenio coa Deputación de Pontevedra, de tal xeito que, por este concepto, non se lle poderá esixir á Deputación de Pontevedra ningunha responsabilidade, nin directa nin subsidiaria.

A entidade beneficiaria quedará obrigada a cumprir as disposicións vixentes en materia laboral, de seguridade social e fiscais do persoal contratado por ela para levar a cabo as actividades financiadas por este convenio, de ser o caso.

### **Décimo oitava. Protección de datos**

As partes manifestan que coñecen e cumpren a lexislación europea en materia de protección de datos de carácter persoal, á que se someten de forma expresa, e comprométense a darlles un uso debido aos datos de tal natureza que obteñan como consecuencia do desenvolvemento deste convenio, no marco do disposto no Regulamento (UE) 2016/679 do Parlamento Europeo e do Consello, de 27 de abril de 2016.

As partes comprométense a:

- Tratar os datos de carácter persoal coa finalidade exclusiva de realizar o servizo.
- Garantir que os datos de carácter persoal non sexan obxecto de ningún tratamento distinto aos previstos neste convenio.
- Non cederlles a terceiras persoas os datos de carácter persoal, salvo nos casos nos que exista unha obriga legal.



As persoas interesadas poderán exercer, no seu caso, os dereitos de acceso, rectificación, cancelación, oposición e limitación nos termos legais previstos, mediante a comunicación ao domicilio social da respectiva entidade.

A entidade colaboradora adoptará as medidas adecuadas para limitar o acceso das súas empregadas e empregados aos datos persoais durante a vixencia deste convenio.

Os datos de carácter persoal deberán destruírse ou devolverse unha vez finalizada a vixencia do convenio e no momento en que, en cumprimento das condicións pactadas ou legalmente previstas, remate a relación entre ambas as partes, sen prexuízo das excepcións que se puidesen establecer na normativa ou nas decisións xudiciais con respecto ao mantemento temporal mínimo de certos datos que o requiran pola súa natureza. Deberá dárselle o mesmo destino a calquera soporte ou documento no que conste algún dato de carácter persoal obxecto de tratamento.

En proba de conformidade, as partes intervenientes asinan este convenio dixitalmente.

